

Société Evangélique de France & Oeuvre de Propagande évangélique de Pons, որոնց գործունեութեան շրջանում գտնուում են տասնեակ նահանգներ: Դրանք ունին իրանց համար յատուկ օրաթերթեր և քանի գնում գօրանում են Ֆրանսիայի նման մի կաթոլիկ աշխարհում:

ՀԱՔԵՇՆԵՐԻ ԵԿԵՂԵՑԻ.

Ինչպէս յայտնի է Հաբէշների եկեղեցին գտնուում է Կոպտական պատրիարքի հոգևոր իրաւասութեան ներքոյ, և նորա եպիսկոպոսը ձեռնադրուում է այս եկեղեցւոյ պետից: Վերջերս Կահիրէ է գնացել պատրիարքի մօտ Հաբէշների Մատթէոս եպոս., որպէս զի հաստատուի Եթովպիոյ արքեպիսկոպոս կամ պատրիարք: Սակայն Կոպտական պատրիարքի կարծիքով այդ աստիճանը վայել է միայն Պետրոս եպ. Աբունին, որը եղել է Հաբէշտանի եպիսկոպոս դեռ ևս Յովհաննէս կայսեր օրով և այժմ էլ կենդանի է: Բայց Աբունան Անգլիացւոց կողմի մարդ լինելով՝ լաւ յարաբերութեան մէջ չէ նեգուս Մենելիբի հետ: Այս տարաձայնութիւնը Մենելիբի և Կոպտական պատրիարքի մէջ կարող է հերձուած յառաջ բերել, և այդ կողմից, ինչպէս երևում է, մի քանի քայլ արդէն արուած է: Մատթէոս եպոս. գնացել է Երուսաղէմ և այնտեղ ձեռք է բերել Հաբէշների համար մի տաճար ս. Կոստանդինի և ս. Հեղինէի անունով: Մինչև այժմ Հաբէշները Երուսաղէմում ոչ մի տաճար չունէին. այժմ ոչ միայն տաճար ունին, այլ և աշխատում են աւելի հիմնաւոր կերպով հաստատուել այնտեղ և հիմնարկել են Հաբէշների վանք ու հիւրատուն: Որովհետև Հաբէշների դնած տաճարը գտնուում է ս. Էջմիածնի Ամենայն Հայոց Կաթողիկոսի գերիշխանութեան ներքոյ, ուստի Հաբէշները յոյս ունին, թէ այդպէս նոքա օրինաւոր կերպով կազատուեն Կոպտական պատրիարքից կախում ունենալուց:

